



## Rěčne lěhwo w Harrachowje

FOTA: MATEJ WIENKA



Póndželu rano podachmy so młodostni w starobje mjez 13 a 15 lětami na rěčne lěhwo do Harrachova (Harrachsdorf), w sewjernej Českej blisko Pólskeje hranicy, kotraž je Serbske šulske towarstwo zarjadowało. Bus wotewza najprjedy džěči w Radworju a poda so potom do Chróscic. 9.30 hodž. wotjědžechu skónčnje wšitcy zhromadnje wot tam do Českeje. 20 młodostnych z kublarjomaj běše tři hodžiny po puću. Potom rěkaše so do stwow zarjadować a mały wotpočink džeržeć. Pozdžišo wopytachmy přěni raz město. Wječor hrajachmy kniffel, wizard abo wolejbul. Wutoru podachmy so na přenje pućowanje k Mumlavskim wodopadam. Je to jara znaty turistiski cil. Poprawom běchu wodopady jenož dwaj kilometraj wot našeho nócłěha zdalene, kublarjej pak běštaj so za 16 kilometerski wokolopuć dojednałoj. Dokelž woda w rěce stajne běži, je jara zymna. Někotři zmužići turisća kaž tež někotři z našeje skupinje so najebać toho w rěce pod wodopadami kupachu.

Na přichodnym dnju wopytachmy krosnowanski park a znawa wodopady. Wopyt wodopadow k wočerstwjenju sta so z ritualom, kotryž wšědnje přewjedžechmy. Při rěce so samo po kamjenjach dele suwachmy. Po wječeri zetkachmy so stajnje wšitcy hišće raz, k zhromadnemu zakónčenju dnja z hrami.

Dale pućowachmy tež na Čertowu horu, kotraž leži w bliskosci našeje pensije. Hora wobsedži w zymje přestrjeň za sněhakowanje a w lěću areal za kolesowanje. Skakanska připrawa „Čerták“ na sewjernej skłóninje Čertoweje hory w českim Harrachowje wobsteji z pjeć sněhakowarskich skakanišćow. Mjez nimi je jedne z cyłkownje šěsć sněhakowarskich lětanjskich skakanišćow na cyłym swěće. Poprawom běše swětowe mišterstwo w skakanju 2024 tu w Harrachowje planowane. Falowacych pjenjez dla pak dyrbjachu je hižo 2019 wotedać. Poslednje mjezynarodne wubědžowanje tu běše swětowe mišterstwo 2014. Najmjeńše skakanišćo so jako poslednje zawrě. Wot toho časa so w Harrachowje wjace njeskaka. Za to pak so na horje z kolesami jězdzi. Tak dožiwichmy česke mišterstwo juniorow w jězdženju z mountainbikom. Młodzi sportowcy dračowachu so potajkim na nahle hory a potom zaso po hubjenych pólnych pućikach dele.

Nimo pućowanjow hrajachmy tež minigolf. Tu so w měšanych skupinach wubědžowachmy. Jedyn z wjele highlightow běše jězba na lětnim sankowanišću. Na dalšim rjanym wječoru hrajachmy wšitcy zhromadnje při lěhwowym wohenju wjelkoraz a chlěšćachmy při tym marshmallows.

Njedželu podachmy so nažel zaso na dompuć. Bus pak njeprjědže njezboža dla dypkownje. Tak podachmy so hakle dvě hodžiny pozdžišo hač planowane wróćo do Łužicy. W tutym tydženju dožiwichmy wšitcy hromadže njezapomnity čas z přewšo rjanymi wokomikami.

Milan Jurk

